

Hag Yijvwnz, Gou Miz Fuengfap Ndei

学习语文, 我有好方法

贵港市覃塘区蒙公乡古山小学六二班 韦桂兰



Yijvwnz cingzcik mwngz ndei lwi? Hagsib fuengfap mwngz deng lwi? Gou miz di fuengfap ndei hagsib yijvwnz, siengsaenq mwngz dingq le, doiq hagsib mwngz mizyung.

Gij fuengfap ndei neix, gou hix dwg daj laeng bouxwnq hag daeuj.

Ban dou miz boux doengzhag hagsib cingzcik gig ndei ndeu, de couh dwg banhcanj ban dou, raeuz yawjyaw de baenzlawz hag yijvwnz.

Miz baez ndeu, gou geiq ndaej cingcing cujcu, haenx dwg aen banringz ndit ronghsag ndeu, dou cingq hwnjdanz, lauxsae daezok aen vwndiz gig nanz ndeu, de cam le haujlai boux doengzhag, cungj mbouj miz aen gezgoj hawj de habhoz, lienj gou boux bingzseiz yijvwnz ak cungj lienzlien ngauzyaeuj. Doeklaeng lauxsae cam: "Bouxlawz ndaej hoizdap aen vwndiz neix, cingj yaengx-fwngz." Banhcanj dawz fwngz yaengx ndaej sangvidvid, caj de hoizdap caez le, lauxsae ngaekgyaeuj riunyum-nyum. Roengzdanz le, gou laeglemx

bae cam banhcanj, baenzlawz ndaej rox hoizdap aen vwndiz gig nanz neix. Banhcanj naeuz: "Gizsaed aen vwndiz neix gig genjdanh, byawz cungj ndaej hoizdap ok, dauqfanj gou cam sou, aen vwndiz baenzneix genjdanh, baenzlawz hoizdap mbouj ok." Gou gazgdgdw naeuz: "Mbouj rox vih gijmaz, aiq dwg hwnjdanz seiz mbouj nyinhcaen dingq ba!" Banhcanj naeuz: "Yienhneix baez-laeng sou aeu haeujsim dingq."

Banhcanj hawj gou roxndaej, hwnjdanz aeu haeujsim dingq aen dauhleix neix, gou ciuq yienhneix guh, dahraix, cingzcik gou beij gaxgonq engq ndei lo, hwnjdanz nyinhcaen dingq dwg aen fuengfap ndei hag yijvwnz.

Lij miz baez ndeu, roengzdanz lo, gyoengq doengzhag cungj youq gwnz cauhsanz guhcaemz, gou buet baeg le, dauqma ndaw gyausz ndoet raemx, yawjraen Siujmingz boux ndeu youq ndaw gyausz yawj saw. De lwnh gou nyi, lai doeg di sawnq gig miz yungh, mboujdanh ndaej rom gij swz ndei gawq ndei, yungh youq ndaw cozwvwnz, hawj cozwvwnz engq sengdoengh, youq ndaw gaujsi lij gojnwngz yungh daengz, roek nienz-gaep gaujsi baihdaw couh ciengz-ciengz miz diuz daez ndeu aeu gauj gij doeg goqrog gyoengq doengzhag. O! Lai doeg di saw, neix youh dwg aen fuengfap ndei hag yijvwnz.

Hwnjdanz nyinhcaen dingq, lai doeg di saw, song aen neix mwngz guh ndaej daengz lwi? Neix couh dwg fuengfap ndei hag yijvwnz.

(指导老师:陆庆峰)



Ranz gou youq lajmbanj, gizneix faex heu baenz raemh, funghgingj gyaendei.

Naj mbanj, miz diuz dah raezrangrang ndeu, raemxdah sawndik raen daej, duzbya youq ndaw raemx youz bae youz dauq. Henz dah miz gaiq diegnywj ndeu, gyoengq baengzyoux iq cungj gyaex youq gwnz diegnywj guh' angq, cuengq yiuhrumz.

Diuz goengloh gvangq he doeng gvaq ndaw mbanj, song henz loh ndaem le haujlai gofaex hung, gyoengqvunz bae haw roxnaez bae

mbanj, byaij ok bakdou couh ndaej dap ci lo.

Laeng mbanj dwg goengqbya, gwnz goengqbya hix ndaem miz haujlai gofaex, duzroeg cingq youq gwnz gofaex simhai dwk ciengqgo ne. Youq laj dinbya maj rim le gak cungj gak yienh va' ndoeng, duz youh duz mbungqmbaj youq ndaw byozva mbin bae mbin dauq, hawj ranzmbanj demgya le haujlai senggei.

Ranzmbanj gou geijlai gyaendei ha! Gou gyaex ranzmbanj gou!

(指导老师:李专红)

Rijiq Ranzmbanj 家乡的小溪

贵港市覃塘区蒙公乡古山小学 韦丽珍



Ranzmbanj gou youq lajmbanj, dwg gizdieg bya heu raemx saw ndeu. Gou cei gyaex diuz rijiq ranzmbanj.

Seizcin, gak cungj va' ndoeng, go' nywj maj ndaej dauqawq cungj dwg, song henz rijiq daegbied mwncup. Mizmbanj vunz lij youq henz rijiq ndaem byaek ne. Banngaiz, daengzgoenz ingj youq ndaw raemxrij, lumjbaenz aen giuzfeiz hung ndeu youq ndaw raemx.

Seizhah, gyoengqvunz cungj gyaex bae henz rijiq youzbyaij, gaeb bya. Gyoengq bouxlaux song sam boux comz youq itheij ganggangj riuriu; gyoengq baengzyoux iq cix gyaex youq ndaw rijiq gaebbya.

Seizcou, dienheiq bienq ndaej

liengzsangj. Gij gofaex song henz rijiq mbaw loenq lo, mbawfaex deng rumzcou ci dwk, lumj baenz duz baenz duz mbungqmbaj mbin bae mbin dauq.

Seizdoeng, henz rijiq caem-rwgrwg. Gij raemxrij gig nit, danghnaez mwngz iet fwngz roengz ndaw raemx bae, fwngz couh deng nit ndaej saenzdedded.

Gou gyaex diuz rijiq ranzmbanj, aenvih de daiq hawj gou haujlai vaiqvued.

(指导老师:李专红)

Neix dwg haemh gig gyoet ndeu, baihrog rumz cihuhu gyoet haeuj ndok. Gou ndwn youq henz cueng muengh ok rog bae, vunz gwnz loh bouxboux cungj suk hoz, gipgip muengzmuengz ganj loh. Gou hai cueng, siengj yawjyawj baihrog miz geijlai nit. "Daiq nit lo!" Gou lienzmuengz gven cueng. Daxmeh ngoenzneix youq yihyen hwnjban banhaemh, lij aeu gwih danci dauqma, geijlai nit ha!

Daxmeh bingzseiz gig gvensim gou, dajleix gou gig ndei. Gou ndat lo, de beiz rumz hawj gou; gou iek lo, de loengh gij ndeigwn hawj gou; gou hozhawq lo, de dat makbingzgoj, aeu yinliu daeuj hawj gou; gou mbouj haisim seiz, daxmeh nai gou, gujli gou, de mbouj guhsing saek di vih gou guh saeh.

Geiq ndaej miz baez ndeu, gou siengj aeu bonj sawgunghgi, couh dwk dena hawj daxmeh, heuh de roengz ban le bae suhden bang gou cawx saw. Dauqma le, gou baez yawj sawgunghgi, aiya, mbouj dwg bonj gou aeu haenx,

Boi Raemxgoenj Ndeu 一杯开水

贵港市覃塘区蒙公乡高占小学五年级 黄凤玲



daxmeh raen gou saeknaj mbouj doengz, cam gou: "Dwg mbouj dwg cawx loek la?" Gou ngaekngaek gyaex. Daxmeh simgip raixcaix, aeu bae vuenh saw. Gou nai daxmeh naeuz: "Daxmeh, gvaq song ngoenz caiq

vuenh hix mbouj youqgaenj, seizneix gou hix mbouj gaenj yungh." Seizhaenx gaenq dwg banhaemh bet diemj cung lo, baihrog youh nit youh laep, hoeng, daxmeh lau nguh gou hagsib, goq mbouj ndaej mbwn nit loh gyaex, lij dwg bae suhden lo.

Daxmeh vihliux gou guh baenz dwgrengz, danghnaez youq haemhntit ndaej caem boi raemxgoenj ndeu hawj daxmeh dwggyaex gou, vih de raeuj ndang, gaij bae gij naet doengxngoenz guhhong, haenx geijlai ndei ha!

Gangj guh couh guh, gou ra aen boi daeuj, gig siujsim dwk riu aen huzraemxgoenj, menhmenh caem raemxgoenj roengz ndaw boi bae. Gou itmienh caj itmienh siengj: Daxmeh

dauqma le itdingh haenx gou. Gouj diemj seiq cib faen cung lo, daxmeh lij caengz dauqma, gou baez lumh aen boi, raemxgoenj liengz lo. Gou youh vuenh boi ndeu, mbouj yaep ndeu, raemx youh liengz lo. Vih gijmaz? Dwg mbouj dwg ci daxmeh vaih lo? Lij dwg..... Sim gou hainduj mbouj onj hwnjdaej. Gou ngamq vuenh boi raemxgoenj ndei, couh dingqny yamqdin sug lo.

A! Dwg daxmeh dauqma lo. Gou angq dwk bae hai dou, daxmeh daiq gij rumz gyoet byaij haeujma, gou sikhaek dawz boi raemxgoenj fwiheiq huhu bongh daengz naj daxmeh, daxmeh doeksaet dwk yawj gou, cieq gvaq boi raemxgoenj ndaw fwngz gou, ndoet song gaemz le, naeuz: "Docih mwngz!" Seizneix, gou yawjraen ndaw lwgda daxmeh gamz gij raemxda ndongqliklik.....De lumj-baenz mbouj rox gangj gijmaz ndei. Gou rox, yienznaez daxmeh mbouj gangj gijmaz, hoeng de rox gou gaenq majhung lo.

(指导老师:覃珍团)